



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.545/2021

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Rrustem Thaqi - kryesues, Afijete Sada – Gllogjani dhe Burim Ademi antarë, duke vendosur lidhur me apelin e parashtruar nga Avni Murtezi, kandidat për anëtarë të Kuvendit Komunal në Prishtinë, nga subjekti politik Lidhja Demokratike e Kosovës (LDK), paraqitur kundër vendimit të Komisionit Qendror të Zgjedhjeve (KQZ), për shkak të largimit nga lista e kandidateve për pjesëmarrje në Zgjedhjet Lokale 2021, si kandidat për anëtarë të Kuvendit Komunal në Prishtinë, në seancën e panelit të mbajtur me 30.08.2021, mori këtë:

V E N D I M

HUDHET i palejuar apeli Anr.545/2021 i datës 27.08.2021, i parashtruar nga Avni Murtezi, kandidat për anëtarë të Kuvendit Komunal në Prishtinë nga radhët e subjektit politik Lidhja Demokratike e Kosovës (LDK), paraqitur ndaj KQZ-së, për shkak të largimit nga lista e kandidateve për anëtarë të Kuvendit Komunal, për pjesëmarrjen në Zgjedhjet Lokale të Republikës së Kosovës që do të mbahen me datën 17 Tetor 2021.

Arsyetim

Parashtruesi i apelit Avni Murtezi, kandidat për anëtarë të Kuvendit Komunal në Prishtinë, nga radhët e subjektit politik LDK, me datën 27.08.2021, ka paraqitur apel në PZAP, kundër Komisionit Qendror të Zgjedhjeve (KQZ), me të cilin pretendon se KQZ-ja, e ka tërhequr nga lista e kandidateve për Kuvendin Komunal në Prishtinë, në mënyrë të padrejtë duke i cenuar të drejtat themelore dhe atë rëndësinë e votimit, ka bërë shkelje ligjore dhe penale të pretenduara, i ka cenuar të drejtat kushtetuese/të drejtat zgjedhore dhe të pjesëmarrjes, i janë cenuar të drejta nga Ligji për Zgjedhje Lokale, të drejtat nga Kodi Penal dhe i janë mohuar apo kufizuar të drejtat për ushtrimin e të drejtës kushtetuese.

Parashtruesi i apelit ndër të tjera ka theksuar se nga subjekti politik LDK, ka pranuar një njoftim verbal në të cilin është njoftuar se nuk mund të jetë pjesë e listave zgjedhore duke qenë se sipas evidencave të KQZ-së, i njëjti është i dënuar me aktgjykimin P.542/2018 i plotfuqishëm me datë 28.10.2019.

Andaj parashtruesi i apelit kërkon nga PZAP-i, që ta aprovoi në tërësi ankesën e paraqitur nga Avni Murtezi si të bazuar dhe ta anulojë njoftimin e kandidimit për Asamble Komunale të Komunës së Prishtinës në zgjedhjet lokale 2021, pasi që i njëjti thekson se aktgjykimi i shqiptuar ndaj tij nuk krijon pasoja juridike sipas Kodit të Procedurës Penale të Republikës së Kosovës.

KQZ-ZRPPC-ja, në përgjigjen në ankesë ka theksuar, se ka kërkuar nga Këshilli Gjyqësor i Kosovës (KGJK), që të bëjë verifikimin e kandidatëve që marrin pjesë në garë zgjedhore për Zgjedhjet Lokale që do të mbahen më 17 tetor 2021, nëse të njëjtit janë dënuar me aktgjykim të plotfuqishëm nga Gjykatat e Republikës së Kosovës. Me datë 22 gusht 2021, Zyra/KQZ, ka pranuar nga KGJK, shkresën me të cilën identifikohet edhe ky kandidat, në këtë rast Avni Murtezi nga Prishtina, kandidat për Asamble Komunale në Kuvendin Komunal në Prishtinë nga subjekti politik Lidhja Demokratike e Kosovës (LDK). Subjekti politik LDK, me datë 23 Gusht 2021, për kandidatin e cekur është njoftuar për informatën që Zyra ka pranuar nga KGJK, dhe i është dhënë afat për të dërguar zëvendësimin në të kundërtën do rekomandon mos certifikimin e tij, dhe se LDK, e ka bërë zëvendësimin. Andaj KQZ-ja, pretendon në përgjigjen në ankesë ka vepruar konform nenit 29 par.4 Ligjit për Zgjedhjet e Përgjithshme (LZP), me rastin e marrjes së vendimit, që kandidati Avni Murtezi të mos certifikohet si kandidat i listës së subjektit politik LDK.

Paneli, pasi që shqyrtoi dhe vlerësoj të gjitha pretendimet e apelimit, në kuptim të nenit 117 par.2 të LZP-së, gjeti se:

Apeli është i palejuar

Paneli, vlerësoi lejueshmërinë e apelit dhe ka ardhur në përfundim se i njëjti nuk i plotëson kushtet e përcaktuara me nenin 122 të LZP-së, dhe nenin 10 të Rregullës Nr. 02/2015-Rregullat dhe Procedurat e PZAP-it.

Pretendimet ankimore të parashtresit të apelit se me rastin e marrjes së vendimit të KQZ-së, ju është bërë e pa drejtë lidhur me mos certifikimin e tij si kandidat për anëtarë të Kuvendit Komunal në Prishtinë, për pjesëmarrje në Zgjedhjet Lokale që do të mbahen më 17 tetor 2021 nuk mund të jetë objekt i vlerësimit në këtë fazë të procesit zgjedhor, për faktin se, KQZ-ja ende nuk ka marrë vendim lidhur me certifikimin e listës së kandidatëve, ashtu siç del edhe nga vet përgjigja në ankesë e KQZ-ZRPPC-së, e parashtruar më datën 27.08.2021.

Kërkesa e ZRPPC-së, drejtuar subjekteve politike për zëvendësim të kandidateve të tyre nuk është vendim i KQZ-së, ndaj të cilit lejohet apeli, por është një kërkesë nga ZRPPC-ja, në lidhje me rastin në fjalë, ku subjektit është njoftuar se kandidati në listën zgjedhore pas verifikimit nga ana e KGJK-së, nuk është i përshtatshëm sipas Ligjit, dhe subjekti ka mundësi ta zëvendësoj me ndonjë kandidat tjetër brenda një periudhe të caktuar para se të rekomandohet nga zyra në fjalë certifikimi apo mos certifikimi i listës së plotë të kandidateve. Pra faza kur është parashtruar apeli është e parakohshme sepse nuk kemi vendimmarrje të KQZ-së, për certifikim të subjektit dhe listës së tyre, por kemi vetëm zëvendësim nga subjekti të cilit i përket apeli, dhe se subjekti nuk është i obligueshëm të bëjë zëvendësimin e kandidatit nëse vlerëson se të gjithë kandidatët janë të përshtatshëm konform nenit 29 të LZP-së.

Meqenëse në rastin konkret nga ana e KQZ-së, nuk është marrë vendim lidhur me këtë çështje juridike, prandaj paneli vlerëson se nuk është nën juridiksionin e këtij institucioni që në këtë fazë të procesit, të vendosë lidhur me largimin e kandidatëve nga lista, ngase sipas nenit 122 par.1 pikat a), b), c), d), e) dhe f) të LZP-së, PZAP-i, vendos vetëm për vendime të KQZ-së, të cilat përfshihen shprehimisht në dispozitën e sipërshtuar. Në këtë rast, nga ana e KQZ-së nuk është marrë vendimi lidhur me certifikimin e listës së kandidatëve për

pjesëmarrje në zgjedhje apo largim të kandidatëve, andaj u vendos si në dispozitiv të këtij vendimi.

Hudhja e ankesës së ankuesit në këtë fazë të procedurës, mbi këtë bazë nuk cenon të drejtën e ankuesit që pas certifikimit të listës së kandidatëve për pjesëmarrjen në gara për Zgjedhjet Lokale të cilat do të mbahen më 17 Tetor 2021, të paraqes sërish apel, nëse konsideron se i është cenuar e drejta e pretenduar edhe pas certifikimit të listës nga ana e KQZ-së.

Paneli Zgjedhor për Ankesa dhe Parashtresa

Anr.545/2021 më datën 30.08.2021



Këshilla Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimit të këtij vendimi.